

摘藻堂四庫全書薈要

集部

欽定四庫全書薈要

集部

御選元詩卷二十三

四

詳校官原任主事_臣李斯咏



欽定四庫全書薈要卷一萬八千四百三十五

集部

御選元詩卷二十三

五言古詩十二

貢性之

題畫

琳館依珠樹青山走游龍
水流疑動石雲低不礙松
將尋采芝侶於此謝塵蹤

題畫鷺鷥

秋堤柳疎疎秋塘荷葉枯水淺微露石水清還見魚飲
啄各自適樂哉此春鉏

題畫

衆峰涵夕陰羣水澹秋色逶迤見古道蕭條少行客雖
無桃花源亦與塵世隔縱有扁舟來重尋恐難得

夜宿書舍

齋居頗幽敞洞然啟八窗梧影落几席密葉如青幢韋
編既滿座濁酒亦盈缸矯首青天鶴時時來一雙

瑪嚕

述懷

流光何駸駸瞬息不我待憶從越山來忽復廿餘載
羈栖迫險艱形容為之改世澤嗟僅延生涯念何在冰霜
歲云暮憂端際滄海積陰韜日月矯首重興嘅願效商
顏翁行歌紫芝採

盛或

春日出南野

霜晴白沙堤水色明春衣肩輿穩如馬花鴨隨人飛遠
碧散霞彩芳翠開林霏土融麥根連薺菜連田肥走覓
南村翁雞黍宜荆扉對酌古柳下談笑偶忘歸

練魯

歌風臺

沛宮秋風起遊子傷所思故人侍高宴故鄉亦在茲酣
歌自起舞忼慨有餘悲秦鹿方犄角英雄並驅馳帝業
亦有在真氣匹夫知天下且歸已功臣何自危九江自

取爾會稽徒爾為俯仰數行泣何以安四陸天地驅日月出入六馬馳上瞻芒碭雲下顧泗水湄荒臺忽千載煙蕪夕霏霏

王宥

奉題聽雨樓

雲林夜澄寂有雨彌更佳漠漠著樹穩霏霏度簷斜入靜意所便爭喧競浮誇弛張任橐籥細大無根芽妙運出元造至理忘紛拏變化本因妄聲聞耳生瑕不如且

置之攝心靜無譁危坐不須寐呼童翦燈花

丁鶴年

題畫

荒荒野日低漠漠江雲冷喬林延暮光澄波浴秋影高
人千載懷乾坤一漁艇

歲晏百憂集

歲晏百憂集獨坐彈鳴琴琴聲久不諧何以怡我心拂
衣出門去荊棘當道深還歸茅屋底抱膝梁父吟

劉履

蘭亭

維茲暮春節光風扇和柔雍雍集蘭渚蕭蕭皆良儔俯
觀百卉茂仰睇孤雲浮摘藻遂揮翰汎觴隨曲流契彼
舞雩詠千載同悠悠世殊事亦泯陳迹空林丘散懷良
不易勞形復何求撫景發深喟疇能踵前修

鄭淵

次韻宋學士見寄

涉江采新綠攬之不成歡我心獨何苦臨風屢彈冠無
心問明月有懷如長川且歌擬招辭采芝向商顏
商顏有神芝豈徒樂苦飢可以起沉痾可以滋容輝乞
身在強健行樂須及時願言賦歸來慰我朝夕思
夕思苦長夜歌枕聽征鴻征鴻為稻梁南北何懂懂相
隨有流水莫比情無窮起來步簷下倚遍青青松
松月流光精照我雙瞳青千里共徘徊兩情正交并取
琴彈別鶴弦寒不成聲誰知揚州地亦隔牛女星

趙汭

題黥令周君儒所藏清溪白雲圖

結屋清溪上白雲與為鄰雲影常在地溪光淨無塵餘
暉及山木掩映忘冬春逍遙窗戶間亦足娛心神相望
彭澤宰仕止孰由人忽憶桃花源悠然思問津

題米元暉江山小景

滄波浩無津揮手揚帆去迴顧江上山蒼蒼但煙樹結
茅傍洲渚豈少垂綸處終然塵迹近未及扁舟趣世運

如風颭朝新夕成故白雪何亭亭條爾天際住寄謝山
中人奚為獨多慮

峽源瀑布

寒峽隱堂隍尋源得飛瀑懸空下千尺飛鳥驚不度雷
激丹嶽摧電穿青山破陰厓排積雪霈雨恒時注我來
屬時艱對此忘百慮塵襟欣一洗徘徊不忍去崇山限
吳楚避遠誰能顧應有避秦人巖前覓微路

謝應芳

養鶴

西鄰主人翁養鶴如養客
專童供鶴料稍慢童受責
試問鶴何好毛羽喜潔白
又能舞蹁躑長鳴振金石
客有鶴骨清粹然含素德
窮居以詩鳴冷面常菜色
賦命鶴不如可為長太息

送秦彥明

美人木蘭舟春風挂帆去
舟輕疾如飛可喜亦可懼
淅江多風波越山暗煙樹
孤月照蓬窗今夜宿何處

寄邾仲義

我思垂虹橋滄波綠楊津
鄂鄂棣花宅瞰此江之濱
荷衣佩秋蘭野飯羹紫蓴
一從橋上別花發三年春
相思復相思為爾歌停雲

我思釣雪灘煙波數千頃
幽人讀書罷乘風放孤艇
沙頭弄明月水底見天影
鱸魚秋自肥楓葉霜自冷
釣鉤未連鰲聊此駐清景

養竹成大林

養竹成大林頻年竹生孫美竹非不多惡竹亦已繁羣
奴為洗之往哉聆我言美者慎勿傷去惡必去根勿虞
爾斧缺勿憚爾力煩宿莽蕩無餘清風仍滿園

題金陵陳時舉宅畫壁

雙松歲寒姿卷石太古色我昔山中遊憩此松下石松
花雪霏霏松葉風瑟瑟安知此清景相對復今日撐空
兩髯龍還在書中室主人罷鳴琴晏坐室生白客來苦
炎熱倚樹欲挂幘不聞天籟鳴但見空翠滴煩襟頓如

洗林壑幽興適經月數相過明朝有行役黃埃赤日中
令人轉相憶

方池詩為馬公振賦

攜我方竹杖看君方池水宛然俯中庭照影月明裏清
風生蘋末素練吹不起魚樂魚自知主人亦應爾

逸菴詩為吳子明作

日高三丈餘先生睡初起雪屋燒暖香行庖鱸水鯉逍
遙白氎巾傲睨烏皮几鈎簾對青山倚杖看流水世事

了不聞無勞洗吾耳

吳中行惠方竹杖

往有方竹杖化龍歸混茫吾知龍之靈知吾力尚強今
年八十餘舉足勢欲僵一目眇數月白日如昏黃出門
多荆棘況復畏虎狼感君扶持意以杖遠寄將稜稜七
尺觚材拔宛種良孤根斬鐵石老節凌風霜聲叟性惡
圓為爾重激昂氣類喜相得顛危賴能防秋風黃葉村
春雨烏石岡挂我沽酒錢時與遊醉鄉赤藤含赭色青

藜失輝光覩物思故人晤言未渠央

倪元鎮過婁江寓舍因偕智愚隱遊姜公墩得
如字

秋暑賈餘勇懷抱方焚如故人江上來風雨與之俱遂
令沸羹鼎化為寒露壺幽尋陟崇丘飄飄素霞裾同遊
得名緇吟嘯興不孤大樹倚高蓋小酌歡有餘三江五
湖上羣峰開畫圖獨憐我鄉土煙塵尚模糊安知艱虞
世得此暇日娛一笑百慮忘松風奏笙竽

高元復

送張吳縣之官嘉定分題賦得鱸鄉亭

秋風吹江水鱸魚寒可罾江空野亭寂送客集高朋
晶盤銀鱗粲玉鱠春雪凝一杯魯酒罷千里吳天激願似
陳文惠勿同張季鷹

沈良

題王叔明倣董北苑風雨蕭寺圖

墨雲擁高山頃刻風雨至劃然海潮聲草木爭壓地曠

野少人行山僧獨歸去衲衣盡沾濕敲戶何急事倉皇
前村民乘車一何亟一婢已抱甕一婦更持器重茅悉
被卷破屋家所寄戴笠者漁郎理網屈雙臂老翁若望
家擔物終不棄陸走尚甚危水行更可畏前溪風雨惡
篙折水流駛行者當早歸居者不豫備北苑為此圖黃
鶴師其意想見晚來晴雲淨山橫翠始信霎時間真宰
特相戲

周槩

懷古

我愛陶淵明所居惟種柳與世實寡諧
委懷在杯酒不有千古心誰識千載後
意欲從之游斯人復何有

夏夜宿流虹寺有感

馳驚竟朝暮似緣飢凍迫如何百年間
區區為形役世塗寡相知醜顏徒自飾
所獲既非寶所喪良可惜生理固草草
進退量我力聖道卒未聞怛焉增內惕

朱武

題破窗風雨圖

牖隙不須捲風雨欲如何
陋巷慙青瑣明窗奪綺疏
桐絲因自緩塵網每為除
鷄鳴晨鼓後螢聚夜燈初
書葉吹還亂簷花落更疎
誰能甘闕寂得得此中居

李訥

題破窗風雨圖

館宿風雨惡客情向寥廓
破榻懸秋風微寒夜相薄
楚客千金裘十年吳下遊
擁衾正酣寢那識窮櫪愁
劉君

有遠志展圖偶相示願弘經濟心大庇天下士

梅實

菊山詩

端居絕塵想丘園日相親俯採東籬菊仰視山中雲既
喜晚香淡亦愛嵐氣新維時風露交菊始揚清芬薄暮
浮雲歸青山常對門陶然樂其間此意誰與論物理正
如此且酌林下尊

陳朴

題秀野軒

四運無停機生意恒相屬
茲軒俯林園長年得娛目
灼灼枝上花娟娟坡間竹
雨過汎晴彩霜餘照寒綠
清芬謝妖靡幽姿遠塵俗
心跡淡已安於焉樂貞獨

金信

箬陽山

林深生夏寒蕭然水精域
今日復重來青苔見行跡
雲生身上衣月照松下石
竟坐聞疎鐘空山未眠夕

丘處機

晚泊古渠

志道既無成
淵冰深有懼
東辭海上來
西望日邊去
雞犬不聞聲
馬牛更遞鋪
千山及萬水
不知是何處

張嗣德

題葉氏四愛堂

東籬秋色淨
芳沼晚花滋
雪落清澗曲
風生楚江湄
幽景尚依然
高懷邈難追
道人繼芳躅
千載有餘思
老屋

四五椽草徑臨清池四時各代謝芬華常在茲勗哉著
令德永與古人期

馬臻

春霽書懷

紛雨洗遊塵潤物亦已足淑氣浮芳鮮山澤一時綠回
鴈遠零亂流雲高斷續伊余愜所向遇景相穆穆好鳥
如含情不語立嘉木靜知春事佳老覺世味熟遂展平
生情誰復辨蕉鹿

危坐

危坐不覺久月照一庭綠三更白露下夜氣濕野服恬
淡失悲喜視聽非耳目閒將黃庭經更趁月下讀

張野泉偕虛谷方使君趙春洲數先輩見訪即

席賦詩各以酒字為韻

幽居局青春水軒僅如斗敲門問誰來過我得良友浮
雲無停陰霽色破古柳人生不自適歲月欺老醜欲挽
湖水春添我盃中酒酒盡意不盡落日照魚笥掀髯出

門去悲歡一何有

述懷

家無負郭田何以懷歸耕豈不有他好復恐勞其生窮
居四十年富貴浮雲輕乳鳥喧高枝壯心忽然驚所憂
聞道晚德業將無成言此向知己欲語已忘情

中秋見月

去年中秋月團團上林藪文士兩三人竟夕坐相守精
光浮白空誰見蝦蟇醜觴酌雜歌吟待得下高柳今年

中秋月輝輝入窗牖照我如有期怪我尊無酒月是去年月不復去年友人生如風花聚散良不偶賢愚與貴賤肉骨同一朽我今見明月再拜復稽首側聞古老言此言豈虛有正秋三五滿萬里絕纖垢玉兔搗神藥服之壽長久我無周生術安得月在手天梯邈難攀中局欲成疚萬方浩漫漫月輪又西走

移蘭

幽蘭雜桃李開花無清香本具巖壑姿庶得韜耿光誤

入芳園中乃覺氣不揚少年不我顧志士徒見傷偶值
朝雨餘日吉復時良呼童劬春泥移根上高岡為爾去
蕭艾曉露滋穰穰永託松竹陰爾生豈不昌細葉舒冷
翠貞葩結青陽緩緩趨土脉慎勿近路傍路傍多轍迹
曲曲如羊腸恐爾遭采掇委質兒女將哀哉楚靈均細
佩荷為裳斯人不可見誰能復其常遂令靡蕪輩各自
爭芬芳回看桃李花零落空啼妝

陪葛元白仇仁近訪南竺詩僧分韻得影字

花開空山春窮幽到絕頂入寺逢遠公頓覺塵慮屏遂
作蓮社遊把酒酌龍井萬生各有態得意還自領此樂
殊未極落日倒林影明朝下山去笑別風篁嶺

題溪山訪友圖

溪風吹長松石路秋影薄下有尋幽人支筇入林壑良
朋眇何許雜樹森草閣畫師發深機筆底氣參錯我昔
事扁舟頗識山水樂于今日月駛此景亦蕭索愧乏買
山資老負宿昔諾展卷令人嗟高歌激寥廓

春江言別口占

送子清江皋江煙黯行路鳥啼山隱春潮長人爭渡世上無別離何由髮垂素

次筠軒詩韻

幽軒列萬竹愜此冲澹襟乃知心跡遠不在山林深客散動秋影鶴歸分夕陰至樂寓言外任鼓昭文琴

鄧牧

翠蛟泉

寒澗豈成蛟流泉亦非翠色緣映帶得意出飛舞外雖
無風霆化自與江海會

仙跡巖

至人猶神龍變化不可測隆然七尺軀印此一片石我
行半江海空飛杳無跡

吳全節

喜客泉

客遊華陽天山逕肩竹輿首登大茅頂天市神仙居回

觀喜客泉稽首孫仙姑方池鑑止水湛湛涵太虛仙君
驅驪龍為吐萬斛珠滾滾出石底拍手相歡呼有情感
無情此理妙鼓桴泉喜客亦喜主人當何如我願斟一
勺萬物同霑濡歌詩謝山靈臨風重躊躇

中嶽廟投龍簡

陽城天地中坤靈奠神嶽積翠千層霄元氣遠盤礴降
神生申甫形勢控伊洛豁訝虎豹蹲偃蹇蛟龍躍猛士
橫戈矛奇陣出幃幄簇簇羅旌旗巍巍聳臺閣玉鏡為

誰開金櫃為誰鑰遠近列畫圖周遭峙郭郭萬狀不可
名起伏互連絡皇皇聖帝居歷代重封爵老柏浮蒼煙
古殿蝕丹腹天朝混華夏秩禮特優渥皇慶二載春宵
盱軫民瘼有旨醮長春玉簡命新琢詔臣走登封香幣
致虔恪邃洞藏寶符瓊音降笙鶴三呼今復聞祥風度
天樂小臣奉明祀三使陟雲嶠箕山勝可家潁水清可
濯遐想飲牛人高風動寥廓賜玦知何時分我雲半壑
歌詩勒嵩珉用贊聖人作

薛元曦

次韻歐陽檢閱濠池觀荷

行行濠池上亭亭見長荷
瓊葩耀初日碧芰卷輕波
深蒲曉色亂微雨晚香多
方舟時自移高軒或來過
豈無河朔飲那復發商歌
商歌一慷慨此物奈君何

黃石翁

自麻仙至筆架道中作

三步五步歇六日七日晴
豈不念我歸春色相送迎
前

宵社酒散行將返清明紅紫小零落嚶嚶相和鳴叢薄
山礬花翫之有餘馨亦欲寄所思歸鴻已宵征悠悠不
可極惻惻難為情荒荒誰與語脉脉曳杖行

望雲

日出五丈高白雲浩如海城郭在雲中山人在雲外望
雲雲氣深入雲雲氣淺亦欲入深雲不知雲近遠

查居廣

二銀女祠

銀冶二女祠撫州之金溪其家姓葛氏無字年未笄羞
顏不出戶婉孌守禮儀在唐寶歷歲其父為胥吏官家
起銀場日夜遭箠楚勤紅問父苦玉頰啼朱雨父命斯
易活誓以死相許禽獸尚知義報父寧死心投身入銀
冶遂化成白金郡縣驚且歎奏名上朝端下詔罷爐冶
雞犬皆平安已經五百歲歷歷人猶傳荒祠俯流水像
設還儼然世間盡兒女此事誰能前緹紫費娥去未有
堪比倫可比惟英皇雙魂抱煩冤至今湘江竹出土含

淚痕

張雨

夕佳樓

西山朝爽氣南山夕氣佳朝爽人共忻夕佳吾所懷
山僧閱世久結廬深避乖蕙樓將對峙菌閣亦安排
維南列崇阜不受煙嵐霾我亦遲暮人心跡倦鳥偕
茲焉寄高躅庶與靜者諧

題墨蘭贈別于一山之京師

三月愁送客春寒雨如霰冥冥返塞鴻悄悄棲梁燕揚
帆五十日蓬萊望中見欲持猗蘭操一奏南薰殿

張師夔畫謝家池塘

春風颯然至幽人午夢醒遙見池塘綠不知春草生如
何騎馬客亦向夢中行

寄題劉彥基丹室

昔聞沖虛宮遠在錦江頭往來多異人東望不可求借
問鴻寶書枕中今在不尚餘一丸藥光景夜不收食之

生羽翼飛去十二樓下視何蒼蒼至情難久留我將拾
瑤草遲子於元州

遊龍井方圓菴閱宋五賢二開士像

獨尋招提遊果得世外歡昔賢所棲集畫像藏屋端山
僧啟鎖魚不待啜茗乾脩廣各異製精彩俱生完堂堂
蘇長公英氣邈難干筇杖紫道服天風吹袖寬清獻薄
鬚眉示我鐵肺肝尚餘所施物片石櫛而寒侍郎胡金
華高括侍中冠眉間可容掌手版出中單潁濱與淮海

秋色亞層巒參寥獨緇衣頷髭茁茅管最後辨才師文
茵高坐安空山一室內舉目皆龍鸞再拜傾挈壺喜極
重悲酸去之三百載歸路何漫漫斯人為列星下視蟲
沙繁寧不念學子道術救彫殘抵舍亟摹貌微哉難控
搏夢中儻未遇展詩時一觀

無波古井水

古井何泓然不食自甘冷去來絕攀緣挽斷轆轤綆唯
有中宵月圓中時照影

獨行

春泥未成沙曳屣柔且平春風不鳴條振衣涼且輕我
意本靜愜中林便獨行松蓋無曲影水樂皆全聲踽踽
迫前岡悠悠度斜阮老樵眼如猫見我不問名直贈金
光草疑是古先生

于立

釣月軒

夕息西軒陰頗愜濠上景持此月明鉤投竿釣清影流

螢飛暗度幽鳥棲還警遊鱗亦復來露下芙蓉冷

圓至

雪

窗鳴風片亂溜凍冰條直夜久忽無聲傍簷時浙瀝青
薪焰方吐紅燈花欲滴閉閣有餘溫蒙衾兀重席

送勤滅宗

出家旅殊鄉同里為骨肉況乃情所厚而茲忽分躅清
霜彫廣野露立凍群木日暮行子身谿谷映餐宿吾聞

含德者凝視養元矚疾進氣雖銳久踐途乃熟歲晏能
復來青燈共寒屋

次韻陪星子胡主簿遊報先寺

木棲與淵蟠所性各有適顧余丘壑戀大藥不醫癖青
山亦可人乍見如素識森然一窗下獻此萬丈碧薄領
三秦英軒昂謝塵迹壯齡已疊組舊閥況列戟潔身粉
黛側僧榻羣面壁國鼎筆可扛天機錦自織停驂偶相
值顧問借顏色東風吹芳原衆卉競春日遠郊農餉起

煙屋香芋栗牛鳴雨隴寒釋耒泥濺膝良時一遊豫能不念民疾二宮山水窟屨鉢恬食息含羞目斬絕詎意陪履屐終期凌蒼巔一視空八極

希陵

觀郊禮

帝闕開嵯峨衣冠捧赭袍金飈動龍旂玉露裛鸞鑣禮樂出大國袞旒拜南郊天儀瞻穆穆日彩見粦粦白瓊芬拒鬯鳳凰來箭韶於昭帝德廣陟配昊天高乾健育

萬物離明位六爻
堯風清海寓弓矢
盡鞬橐

行端

擬寒山子詩六首

錄二首

木落湫水寒千峰正岑寂
惟聞虎嘯聲不見人行迹
霜露溼巖莎月輪挂空碧
此時觀此心獨坐盤陀石

山中高且寒人罕來登陟
松搖雪珊珊蘿罅煙冪冪
巖花春不開淖水夏方釋
住此夫何為心源湛而寂

祖銘

宿徑山娑羅林二首 錄一首

高齋宿層巒無眠振衣起歷歷夜方悄婉婉情自美濃
露灌桂花清香襲庭几林曠鳴籟隱空淨停雲徒萬事
坐若遺靜極到天理舉目注秋江涼月薄如水

徑山五峰

堆珠峰

天勢下凌霄坐使萬壑趨元氣結巒岫獻此大寶珠翊
殿護釋梵鼓鐘殷人區

大人峰

五髻生雲雨鎮踞何春容具此大人相題為大人峰偉哉天地間萬象同擴充

鵬搏峰

峰勢來大鵬鼓此垂天翼培風本無待適茲造化力何須問天池在在六月息

晏坐峰

松杉太古色不別春與冬道人此晏坐一念萬劫融不

特座燈王等了諸法空

朝陽峰

二儀開幽漠日月臨下土萬物麗高明此峰正當午
堂大聖人兩眼空寰宇

清珙

山中天湖卜居二首

林木長新葉遠屋清陰多深草沒塵迹隔山聽樵歌
自耕復自種側笠披青簑好雨及時來活我新栽禾
遊目

周宇宙物物皆消磨既善解空理不樂還如何

月來照我門風來吹我襟勸君石上坐聽我山中吟元
鬢化為雪朝光成夕陰萬事草頭露豈得長如今

智寬

龍淵景德禪院分韻得院字

涼飈動新秋遠麓集群彥虛巖靈籟鳴列坐罷揮扇情
愉引杯觴歡劇互酬獻酡顏映落日林光散淩亂池深
魚自樂樹密鳥相喚老桂粲幽叢天香滿西院懷哉鄭

廣文樗櫟散崖岬

清欲

歸雲亭

作亭竚歸雲雲歸宛亭亭道人本無心澹與雲相應夾
徑樹嘉木沿溪羅翠屏人閒境逾寂雲白山自青看山
坐亭上披雲濯清泠

聽松堂

風來松韻清風去松韻停松堂得松韻六月生清水重

陰覆瑤席時作韶鈞鳴世無寒山子好在誰解聽我欲
呼朱絃和此太古音忽聞深澗泉悠然契吾心

寶月

玉山佳處以夜闌更秉燭相對如夢寐分韻得

闌字

玉醴徐澗酌銀燈消薄寒清談方欲洽高宴殊未闌孰
知契濶餘盡此平生歡驚風起山阿斷鴻行路難嘉會
豈云易長歌為辛酸

題界溪顧處士梅隱齋

橫斜一枝春清淺半溪水幽人樂閒居暗香透窗几月
明雪初晴爽氣動髮髓脫巾調素琴渺渺天如洗

文信

題雲林竹圖

粲粲碧玉枝託根在崑崙日出四海靜影拂青雲端君
王愛直節樹之黃金門華繁實且多持以慰青鸞

自恢

書畫舫餞謝子蘭以江東日暮雲分韻得暮字
結屋如畫船飛梁水中度迴窗與曲檻粲粲足可數書
卷高滿牀張圖設茶具驩虞集佳賓山水發深趣幽人
殊方來雅論夙欽慕眷言聊徜徉扁舟逐飛鷺明當送
子行相期遲歲暮

子賢

送葉明齋如京

傷君遠行邁白日何淒其微陽漏林光稍稍照人衣天

高鳥垂翼風急花落枝荒臺俯流水萬里長相思

芝磧

湘竹龍

杜君得湘管歸弄湘江潯湘君抱瓊瑟和作孤鸞吟魚
龍起夜聽月小江深深鮫室停秋杼鈞天協廣音行將
攬芳杜遲子蒼梧岑

觀通

壺中荷花

愛此荷花紅天然匪雕飾披披妍令姿亭亭映清湜風
引茵陳香露含珊瑚色真之白玉壺光輝滿瑤席

宗衍

遣興

龍化不改鱗士達不改身借問當路子如何棄賤負仲
尼稱大聖原壤乃狂人光武有天下嚴陵實隱淪故舊
不可忘何況師友親嗚呼千載下此道如埃塵

獨坐

客至固足喜不至靜亦佳柴門終日掩風過有時開豈
不含笑言輕易交成乖庭柯有好鳥衆音何喈喈晨征
暮來止乃與我心諧

泊平望

計程息勞牽日晚江路永連檣如有待聚泊就村井沙
明鷗羣回月出人語靜心清獨不寐況乃風露冷因思
往來客終日困馳騁得非衣食驅無乃緣造請吾人方
外士素志慕箕穎胡為淹水宿混跡問鼃黽丈夫別有

念此意誰得領人生未聞道如何臥煙景

東畢為陳隱君作

晨光散蒼涼灌木露未晞衆鳥各相命遲遲出林飛豈
不畏網羅所苦渴與飢人生有常策胡為不知歸東畢
春雨深地澤黍豆肥理荒朝荷鋤迫暮返荆扉筋力固
疲倦庶幸無禍機鹿臺多黃金首陽悲采薇且自食吾
力焉知彼是非

雜詩次俞伯陽韻

無營百慮省有作慮乃多空林無過客寂寞類山阿果
熟風自落蛛絲當戶羅斷蓬非無根落木亦有柯所懷
願不獲抱恨將如何白雲悵悠悠回首聊詠歌

靜趣軒

躁靜失本性滯寂聖所訶不有止觀幻欲靜動愈多道
人非避世偶此住山阿幽侶不到門況聞車馬過閒雲
謝冗跡止水無驚波山光明戶庭定起聊婆娑擾擾奔
競者聞風意如何

對菊有感

百草競春色惟菊有秋芳豈不涉寒暑本性自有常疾
風吹高林木落天雨霜誰知籬落間弱質懷剛腸不怨
歲月暝所悲迫新陽永歌歸去來此意不能忘

晚涼懷故山

疎林生晚涼微日映書幌南山澹相對幽磬時一響懷
歸見素心感舊發遐想稍待秋橘香風汀蕩雙槳

浴罷

浴罷振輕袂漱齒汲石井木落歲已秋山深夜逾靜細
詠餘幽響清心寄真境松門涼月陰拄杖一僧影

啄木

啄木江南飛蟲生上林江南亦有蠹不聞剝啄聲蟲
種日以滋木病日以深啄木不啄蟲孰慰鳳凰心

墨蘭

楚雪春已晴沅湘水初滿去年故葉長今年新葉短波
明碧沙淨日照紫苔暖不見澤中人江南暝雲斷

楞伽寺得月臺

月出湖水湄清輝映林屋山明秋樹靜照見幽鳥宿開
門誰遣入俯磴近可掬道人猶未眠經聲出深竹

惟則

登西林

沈鬱難自居偶思散遐矚拄杖登西林斷崖倚脩竹崖
上叢花開飛禽自相逐崖下清川流水光泛嘉木四月
風雨多平野一時綠長嘯白日低煙雲起空谷俯視萬

化間勞生亦何足

元珪

題徐良夫耕漁軒

高士解塵鞅結廬遂幽素
曠爾樂天真怡然乃成趣
青山陰虛牖白雲靄嘉樹
飲水豈吾貧茹藿非吾慮
野花自妍芳山鳥亦幽聚
一與衆累睽既往亦已悟
時與樵者行或從朋侶賦
寄謝華冕流何為逐鷓鴣

覺慧

題徐良夫耕漁軒

隱者靜忘慮山幽似盤谷
解纓濯清泉援琴愒脩竹
鳥語哢暄候晴光泛嘉木
逍遙愜素抱澹泊恒自足
白雲我同心晴來與之宿

大訢

顏暉猥

峽冬拖長冰崖滑如積鐵
客子涕縱橫悲猥助嗚咽
仰視浮雲馳再聽蒼石裂
不畏行路難但感芳年歇

本誠

貧居

造物非貧我欲我閑且安貧居自有樂此樂非人間蕭
然一茅宇十年卧空山山深無客來獨與雲往還芰荷
製冬衣藜藿供朝餐登山玩崔嵬臨流聽潺湲為無貪
著念隨地可盤桓但得閒中樂豈以貧為艱愈貧愈無
事無事心愈閒雖居人世中恰似出塵寰

善學

為道深題墨竹

誰寫雙簣當半晴半帶雨
幹直挺青琅葉踈攢翠羽
清容禪室懸瘦許山僧侶
倘遇老香嚴定將公案舉

山水圖為李用之書

良工善丹青所得意外意
紙上移江山筆端轉天地
楊柳護煙村雲霞鎖蕭寺
索我一題詩對之起幽思

大圭

夏日同趙生鄭生許氏兄弟遊龜山山有大石

下有遺址相傳歐陽詹讀書於此因造焉相與
慷慨賦詩分韻得魚字

閒情素乖俗樂彼中林居未云果幽賞意有餘出
郭青山多佳木亦扶踈並遊得良友方駕從所如翠微
薄炎景蘿風汎涼裾雲逕步窈窕石門入清虛少留席
豐草綠緜綿以舒叢柯翳鳴鳥石澗清有魚形神一蕭
散疲勩亦以祛黃緣龜巖東遂即歐陽廬懷賢仰高躅
撫蹟驚廢墟願留石中室畢誦人間書茲焉恐遲暮眷

眷空躊躇

造唐山人居

行行野田盡荒蹊入秋水何人有新屋鬱鬱松林裏欣然造其門晤言乃君子解衣坐微涼超遙適閒美日澹疎雨晴山色散窗几石上聞鳥鳴林端見雲起平生事外心即此胡不喜少暇同飲泉幽期自今始

臺上晚涼未去

高臺日將暮風涼未歸客長歌林木秋微靄山光寂素

友適心期幽賞忘物役殷勤松間月照我歸途白

道充

送象先鏡上人歸南昌

赤霄有紫鳳文彩光陸離不肯阿閣巢寧受樊籠羈垂
垂翠筠實翳翳梧桐枝豈無食息好遑遑欲何之神飈
激長翮羣翼何由追還作朝陽鳴慰此長年思

義傳

姑蘓懷古

秋日何短短清游何款款白雲無定踪飛入長洲苑空
臺誰與登麋鹿事逾遠哀哉城頭烏夜夜月中滿西南
山水佳欲往足力軟爛開木芙蓉寒塘弄清淺臨風一
徘徊高吟惻悽斷

鄭氏允端

題耕牧圖

幽人薄世味耕牧山之陰自抱村野姿常懷畎畝心行
行南山歌落落落梁甫吟挂書牛上角揮鋤瓦中金飽飯

黃昏後力田春雲深四體勤樹藝三生悟浮沉巢父世
高尚德公人所欽伊人去已遠高風邈難尋撫卷空歎
息俯仰成古今

望夫石

良人有行役遠在天一方自期三年歸一去凡幾霜登
山凌絕巘引領望歸航歸航望不及躑躅空徬徨化作
山頭石兀立倚穹蒼至今心不轉日夜遙相望石堅有
時爛海枯成田桑石爛與海枯行人歸故鄉

效古

人生天地內，翕歛如轉蓬。
有材不早用，老去悲途窮。
甘羅豁達士，意氣自豪雄。
奉辭使列國，十二登上公。
早達勝晚遇，應鄙垂釣翁。

詠鏡

皎皎奩中鏡，相隨越歲年。
清光何所如，明月懸中天。
我昔十五餘，顏色如花鮮。
對之理晨妝，塗抹鬪嬋娟。
邇來年頗長，貧病相憂煎。
形容漸老醜，無復施朱鉛。
今朝鏡

亦昏塵垢蝕連錢相看自黯淡焉能分媿妍人生有盛衰物情隨變遷世間類如此何用增慨然

聽琴

夜深衆籟寂天空缺月明幽人據槁梧逸響發清聲一彈再三彈中含太古情坐深聽來久山水有餘清子期既物化賞心誰與并感慨意不已天地空崢嶸

狄婉兒

秋夜語薩生

團團月桂滿藹藹秋蘭芳桂影天外飄蘭生王者香賤
軀入風塵羞比蘭桂芳歡狎但下帶厭浥時沾裳今喜
得君意長願侍君牀雉朝雊嘉樹鵠暮據盤桑擬載指
南車相逢返北堂共逐行雲去瞻望明星光銀燈漫綽
約玉珮解鏗鏘脫此圍鸞棲盼彼遠羊腸行歸作君婦
生死無相忘

晚翠亭鬼

晚翠亭詩

一徑入青松飛流澹晴綠道人晚歸來長歌振林谷
山深不知秋落葉下枯木須臾翠煙開月色照綵服

御選元詩卷二十三

欽定四庫全書薈要卷一萬八千四百三十六

集部

御選元詩卷二十四

七言古詩一

耶律楚材

和黃華老人題獻陵吳氏成趣園詩

雪溪詞翰輝星斗紙蠹塵蒙詩一首湛然揮墨試續貂
囁嚅使人難出口丁年彭澤解官去遨遊三徑真三友
悠然把菊見南山暢飲東籬醉重九獻陵吳氏治荒園

成趣為名良可取養高不肯事王侯閑卧林泉了哀朽
今年扈從過秦川可憐尚有蕭條柳歸計甘輸吳子先
麗詞已後黃華手知音誰聽斷絃琴臨風痛想紗巾酒
嗟乎世路聲利人不知曾憶淵明否

過陰山和人韻

陰山千里橫東西秋聲浩浩鳴秋溪猿猱鴻鵠不能過
天兵百萬馳霜蹄萬頃松風落松子鬱鬱蒼蒼映流水
天丁何事誇神威天台羅浮移到此雲霞掩翳山重重

峰巒突兀何雄雄古來天險阻西域人煙不與中原通
細路縈紆斜復直山角摩天不盈尺溪風蕭蕭溪水寒
花落空山人影寂四十八橋橫鴈行勝遊奇觀真非常
臨高俯視千萬仞令人凜凜生恐惶百里鏡湖山頂上
旦暮雲煙浮氣象山南山北多幽絕幾派飛泉練千丈
大河西注波無窮千溪萬壑皆會同君成綺語壯奇誕
造物縮手神無功山高四更纔吐月八月山峰半埋雪
遙思山外屯邊兵西風冷徹征衣鐵

扈從冬狩

并序

癸巳扈從冬狩獨予誦書於穹廬中因自譏云

天皇冬狩如行兵白旄一麾長圍成長圍不知幾千里
蟄龍震慄山神驚長圍布置如圓陣方騎雲屯貫魚進
千群野馬雜山羊赤熊白鹿奔青麋壯士彎弓殞奇獸
更驅虎豹逐貪狼

御閑有馴豹縱之以搏野獸

獨有中書倦遊客放

下壇簾誦周易

郝經

乙卯秋月十九日登泰山太平頂

窮秋老雨四十日坤軸欲爛陰霾纏我來方作泰山遊
玉虹一夜收雲煙山靈奕奕生喜色突兀撐裂青蘿天
輕裾飄飄過黃峴乘興直到三峯前霜餘灌木出秋色
萬疊紅錦幪椒巔泓澄寒溜浸太古翠壁細瀉珠璣圓
當時秦漢極侈麗未必如此皆天然天門中斷兩屹立
箭筈一磴蛇蜿蜒凌層絕頂肆崇峻佇立矯首望八埏
長天沈沈入西極九州却在東海邊衝風慘淡萬里來

海窟勁刮鯢鯨涎須臾白雲生嶽麓脚底決莽無山川
秦壇周觀覺浮動滿地覆冒兜羅綿忽疑山移入海中
白浪四洶虛濤掀山陰瑰詭出赤氣翠暈相鈎連
下從谷底上碧落寶塔萬級高蟠旋遂登日觀叱日馭
六龍倒著珊瑚鞭玉鱗剝落金甲坼九芒迸綺生血鮮
三山搖蕩海水沸蓬壺縹緲來飛仙為言此色與此界
君自固有非塵緣恍然記悟復無語把手一笑三千年

趙州石橋

輪囷太古綠玉月半插水面不挂天一砭一段數十丈
大業至今七百年深銜密市無罅隙嵌磨妥帖堅且圓
仰視壓面勢飛動勁欲拔起疑墜顛鬼功神力古未有
地維欲絕還鈎連蛟龍辟易洺水伏細紋參錯如新鐫
晴虹不散結元氣海捧縹緲纏飛煙衝風倒景鯉背搖
金瀾滉漾青環偏乾坤壯觀全趙雄幾回笑殺秦人鞭
往來細讀張相碑直與北嶽相輕軒先君有詩不忍看
摩挲華表空泫然

使宋過濟南宴北渚亭

往年薄遊宴渚亭高秋霜落波光清今年持節又來宴
菱葉荷花香半城城南倒插泰山脚城北沈涵海氣橫
周圍盡浸樓臺影魚鳥慣聞簫鼓聲錦堂流出珍珠冷
花底漂搖碎光炯名泉多在府第中繡簾深掩臘脂井
推波委濤到北渚匯蓄涵渟數十頃虹橋桁柳平分破
巨壑雲莊入煙暝濟南名士多老成行臺突兀皆名卿
尊中正有李北海坐上寧無杜少陵堰頭臘甕滿船求

歌舞要送行人行江南風景已不殊渚亭即是西湖亭
望京府賞紅梅

汴梁宮中絳綃梅移向汴河堤上栽青條團搭杏花顙
瑣細向陽才半開張公小隊呼我飲風色偃髯寒氣凜
玉銜徑踏黃河水貂帽颯簷掀紫錦金鞍細馬歌舞人
雪壓小橋不動塵入門下馬簇花宴紅蓮舊府花正新
玉川金波碧香酒折花遍插分素手春透寒梢未全綻
風流正要臙脂瘦賞梅不用歌落梅緩歌却著銀笙催

愛香細擷生霞蕊浮動雲腴嚼一杯本是前村冷澹花
不稱王侯將相家明朝會散更向明月底藉雪凍吟踈
影裏

太平頂讀秦碑

岱宗太平頂磨崖與天齊左列則天頌右刻張說辭文
采與書法不離近代規漢封宛在周觀東秦壇負出絕
頂西壇前圓平值中峰突兀上有始皇碑年深雨漬百
裂餘析作兩峰蹲半規面陽數字仍可辨隙縫重銜苔

蘇皮中間隱約見制可完好可辨惟臣斯拳如釵股直
如筋屈鐵碾玉秀且奇千年瘦勁益飛動迴視諸家肥
更癡當時風雨有餘怒豈容夸石獨在茲祗應神明愛
尤物不肯轟擊常護持昔年韓文公曾賦岵嶺詩字青
石赤皆傳聞漫為咨嗟涕漣漣何如親登泰山日觀峰
光怪特見絳氣纏金虹摩挲細讀秦相碑天門高咏來
清風乃知山靈不相負夜宿天邊不忍去醉倚雲窗重

回顧

楊奐

題趙繼卿耕隱圖

惜君玉雪成老醜知君近出太常後

太常名之傑以諫南北征知名求

田問舍計差早恐君不是扶犁手
長安冠蓋闢於雲但說子真耕谷口
此心肯處萬事了直待鐘鳴柝
哀朽溪山入眼畫樣新雨翠煙嵐浮戶牖
松亭可琴水可舟中有石田三百畝
剩鉏烏豆種紅秫十分桑麻居八九
軟浸豆屑飯晨犢濃湯秫腴芻社酒冷
盆繅絲給公上挑

燈紡績裏妾婦索錢豪吏喜食肉準備羹材養雞狗荆
棘滿野獨漏網太常遺澤亦已厚軍興科徭古不免為
勸比鄰死莫走殘年得飽實大幸傍舍餽籬插花柳君
家平日無雜賓我輩過門須一扣若非代北少陵翁定
是周南紫陽叟更闌朗咏除夜篇聊與蒼生洗塵垢

有懷梁仲經父

美人熒熒在何處海闊天低隔煙霧珊瑚零落芙蓉空
咫尺相望迷去路翠輦金輿雙鳳皇風吹環珮聲琅琅

壺觴狼籍事已往一日萬里愁茫茫劉郎竟是誰家客
歲晚霜華林葉赤美人熒熒在何處鴨綠江頭江月白
姚樞

賦龍池水

即平水之源

濁涇一斛幾半區白田一沃成膏腴汾水流源亦不殊
循崖挾阜不可渠姑射山高草木敷精英四散清流疏
清流溉田田即墾耕健嗇夫疲糞車陳蕃一室還掃除
淵明亦復新其廬伯夷柳惠聖之徒其源逼窄其流污

春日秋霜與化徂何當得此輔唐虞中行未易良可吁
晉人努力無為迂

許衡

青山

青山偃蹇與世疎只將秀色供吾徒知君如我有山癖
深探遠討吾不如金燈峰上詩千首挂鏡臺前一杯酒
人間萬事盡浮雲故人曾為相思否雲邊鸞鳳玉鞭鳴
跛鼈蹒跚蔓繭生天末碧雲凝遠思夕陽無語下西城

張弘範

春雪

餘寒料峭黃昏暮
驚見東風吹柳絮
杜陵野老獨歸來
却入灞陵橋上路
黃鶯愁立花深處
恨濕金衣寒兩羽
園林渾似晚春時
一片瓊花飛玉樹

李冶

七星巖

巖公舊隱名七星
幽闌寥廓真仙庭
栽栽雲蓋結雙頂

天風不動聞流鈴字青石赤尚奇偉
爲訶守護煩山靈
不是人間玉局所
今貯天上琅函經
我疑山澤自通氣
又如蟄戶藏雷霆
曾聞洞府仙所話
歲與下土收蝗螟
旱時禱雨叩輒應
古井猶帶蛟龍腥
土壤飄飄槩可想
地籟瑟瑟猶堪聽
世上樓觀豈不有
窮極技藝分紅青
何如石室堅且好
萬古仙跡留芳馨
我來到此洗俗慮
仰視玉宇摩青萍
盧敖尚許隨學道
驂鸞駕鳳遊滄溟

劉因

感秋

思古人之
不可見也

湘絃悠悠阻清音
駕車欲往洛水深
白榆一葉驚河漢
萬里碧霄中
夜心玉鸞翩翩紛翠羽
髣髴機絲隔煙霧
瓊枝難得芳華年
惟恐流光兩遲暮
河傍有星名牽牛
此星既出令人愁
明朝再見明河影
已隔人間萬古秋

飲後

日光射雨明珠璣
怒氣鬱作垂天蜺
天漿海波吸已竭
倒景徑入黃金卮
金卮一傾天宇閑
天公愁吐胸中奇

海風掀舉催月出吹落酒面浮明輝瓊芝瑞露千萬斛
肝腸瀟瀟清欲飢金宮銀闕此何處夜半夢落崑崙西
眼中之人素所期赤霜為袍丹霞衣明星煌煌何太速
碧霄悵望白雲低

歸去來圖

淵明豪氣昔未除翱翔八表凌天衢歸來荒徑手自鋤
草中恐生劉寄奴中年欲與夷皓俱晚節樂地歸唐虞
平生磊磊一物無停雲懷人早所圖有酒今與龐通沽

眼中之人不可呼哀歌撫卷聲嗚嗚

雪翠軒

西山萬古青未了黛綠鬟雲已傾倒豈知太虛忽生白
恍如長夜今復曉紫陽仙翁見本根白波開天餘浩渺
胸中盤曲此高寒曾夢肝腸倚天表蒼崖飛來天出巧
為護煙嵐翠如埽萬縷寒煙吹不舉靜秀依依見娟好
此時先生一開軒平生辟立今玉峭脚底游塵輒更紅
黑頭擾擾誰為雄臨風回首三太息安得置此冰壺中

西山秀色千萬重一顧可洗浮雲空遙望飛泉駕遠壑
中有一路開雙松人間風日不到處來訪軒中雪翠翁

遊郎山

昨日山東州馬耳索御凌風嘶今日軍市中不覺已落
山之西山之面背一無異不待風煙變化神已迷危關
度雪嶺亂石通荒蹊林間小草不識風日自太古我行
終日仰羨木杪幽禽啼但見雨色來雲物颯以淒忽然
長嘯得石頂痛快如御駿馬蹄萬里來長風五色開晴

霓長劍倚天立皎潔瑩鶚鵠平地拔起不傾側物外想
有神物提詩家舊品嵩少同畫圖省見巫山低誰令九
華名獨與八桂齊千態萬狀天不知敢以兩目窮端倪
騫騰誰避若飛隼側瞰何屈如怒猊千年落窮邊煙草
寒萋萋若非酈亭書生此鄉國物色誰省曾分題

酈道元注

水經說酈亭其先世所居也

酈亭其先世所居也乾坤至寶會有待豈有江

山如此不著幽人棲頗聞山中人雲間時聞犬與雞只
疑名山別有靈境在不許塵世窮攀躋不是先生南遊

有成約徑欲共把白雲犁九疑窺衡湘禹穴探會稽玉
井爛賞金芙蓉日觀倒卷青玻璃風煙回首暮瀟灑南
遊準擬相招携

送徐生還鄂

燕山送客歸南州興來每恨無扁舟君歸為我謝江漢
思君不見令人愁千里風煙想瀟灑一代英雄成古丘
當年才氣鸚鵡洲撫掌笑殺黃鶴樓黃鶴歸來哀江頭
江山依舊人悠悠浮雲萬古恣變滅眼中擾擾何時休

紫陽仙人歌遠遊飛蛟起滅三千秋為君揮手崑崙頭

紫陽謂晦翁飛蛟

起滅見遠遊集註

宋高宗題李唐秋江圖

秋江吞天雲拍水濤借西風挾不起斷雲分雨入江村
回首龍沙幾千里澹菴老筆搖江聲髣髴阿唐慘淡情
千秋萬古青山恨不見歸舟一葉橫

登鎮州隆興寺閣

太行鱗甲搖晴空層樓一夕蟠白虹天光物色驚改觀

少微今在青雲中初疑平地立梯磴清風西北天門通
又疑三山浮海至載我欲去扶桑東雯華寶樹忽當眼
拍肩愛此金仙翁金仙一夢一千載騰擲變化天無功
萬象繞口恣噴吐坐令四海皆盲聾千池萬沼盡明月
長天一碧無遺蹤我生元感非象識此眼此臂將安庸
海岳神光埋禹鼎人間詭態何由窮金天月窟爾鄉國
玉豪萬丈須彌峰一杯徑欲呼與語為我返駕隨西風
堂堂全趙思一豁江山落落吾心胷中原左界此重鎮

形勢彷彿餘兵衝歌舞遺臺土花碧旗幟西山霜葉紅
乾坤割裂萬萬古烏鳶螻蟻為誰雄滹水悠悠自東注
落日渺渺明孤鴻

示孫諧

龍山古壯哉鬱鬱盤煙嵐一讀元子詩冷然玉泉甘江
山勝景要佳客而我不到懷應慚雷家髯翁虎眈眈劉
氏遺愛存河南百年喬木動秋色藍輿誰與供奇探崑
山出美玉楚國多梗楠孫郎復貴種良璞須深函勾萌

慎培養雲霄看巖巖野夫老矣一何拙平生只有歸休
堪傳經訪道可無媿為我早辦龍山菴

尚野

淵明歸來圖

羲皇上人鄉里兒田園將蕪非所思楚聲雖託絕怨懟
高情千古歸來辭歸來忽復河山移忠憤意切語益微
白雲遙遙望不極東籬舊菊西山薇夷齊奚疑怨耶非
況乃貌此遺世姿文行圭璧照方冊飄然髣髴空同時

子雲擬聖諸儒譏法言美新吾誰欺考亭夫子春秋筆
昭然晉室日星垂

董文用

送蕭郎中方厓奉使安南

烏臺空發行臺封司農一載歸鰲峰十常八九不如意
人生處處歡伯逢帝膺天命念赤子樓船未忍征蠻貊
古來每重皇華選蕭君禮貌先雍容文學僉言當此舉
宰相見之皆悅從安南小邦等鱗介早赴絳闕朝真龍

王惲

宿仙山朝元觀題示

太行北走開四門川原落落風煙屯仙山西峙如虎踞
石嶺東抱猶龍奔道林中蟠百餘畝顧揖殿寢何雄尊
仙翁得仙事惝恍碧霞洞主玄元孫百年朝元去不返
寶籙祕泄風雷燉陰靈訶護石壇古老雨留漬蒼苔痕
緬懷矯矯東瀛老變化能大天溟鯤謝公本是濟時具
誰使卧老東山墩豐碑不愧蔡邕筆再拜遺像儼以溫

我來夏交樹陰翳萬橘翠瑣芬蘭蓀平生素有林壑癖
苦厭闐闐埃霾昏每來福地愛蕭爽跼步乃與仙凡分
山川景氣得人勝喜對羽客開清樽夜深靜臥月東出
林影布地翻瑤琨天風吹空萬籟息明星當上手可捫
恍然人境兩竒絕月露一洗清神魂世間塵土幾千丈
有夢不到瑤臺垠人生幾何胡不樂例自跼束駒服轅
惜哉清景不可駐一聲啼鴉開林煙明朝人事隨日出
坐看蟻穴蜂衙喧

僧傳古坐龍圖嚴東平所藏至元二年秋九月
張蒼省耀卿處觀七年閏十一月甲戌公退馬
上偶得時秋苦旱冬天無雪

深山大澤物所蟄千丈懸淙挂青壁潭陰水黑不見底
老雨初開元氣溼蒼龍何處行雨歸闔首踞坐紅雲堆
山僧駭絕噤不語萬壑陰霧生緇衣咄哉傳古隱龍性
隔戶寫影窺天機一從元化隨此筆飲海不復觀晴霓
世間畫本萬尺蠖尾鬣一掩無晶輝比年一旱幾焚如

牲幣空事山川
雩群龍癡睡洞府黑六合任使黃霾汚
何當鐵匣出雷火衝屋而去騰天衢六丁奔命僕射御
倒卷溟渤天瓢斟滂沱一洗乾坤淨却歛神功寂若無
程鉅夫

為曹仲堅題漁父圖

風煙浩渺浪拍天百帆齊開爭一先輕舸蕩漾自來去
詩人曾賞古漁父山圍別浦樹參差水淨沙明人跡稀
大罾小罟較得失魴鱖暗作枯魚泣直針為鉤餌亦無

煙波不見真釣徒林中茅屋是誰子袖手無言方隱几
送余率翁職滿謁選并寄容齋承旨肯堂學士

江南四月梅子黃衣袖已試荷風香出門有客欲萬里
使我憶得西山蒼西山何處雲半髮夜深斗極回寒芒
磴泉自紅澗自碧樓倚白雪歌滄浪容齋遂慵兩相好
劍氣耿耿龍騰驤我曾握手極千古逢之滿腹生琳琅
曉天一笑江水長燕鳴岸雨催牙樯

奉餞學舟老先生之武陵

疾風吹雲雲不裂南紀酣酣三日雪辰陽冷掾故不冷
破帽棕鞋來作別先生自是我輩人錦袍丹紱曾青春
黃金築臺不肯上水晶宮中一角麟一朝忽著儒冠起
泛宅浮家五千里繫船花岸如蒸霞為展臯比說詩禮
宣尼未始三年淹我亦鳴榔下湘水蕭雲曹志上所知
銓量當遣教五溪先生行止無不可瓜期況爾來遲遲
問君此行何所之武陵思我還當歸是間少長致足樂
采花食實薪桃枝落日天低洞庭野木葉蕭蕭風上下

留君小住君掉頭前有十漿先饋者蒼蒼煙水解迷人
莫倚川原物色新漢家會有蒲輪使珍重修程穩致身
漁翁圖

漁翁牽纜漁婦紡膝上兒看掉車響溪南溪北趁冬晴
水急船多欠新網祝兒休啼手正忙網成得魚如汝長
七真山洞雲觀

七真之山白雲裏絳闕神宮半空起祁君有志于君成
更賜雄材自天子東臨滄海西崑崙森森翠節排天門

三更日射芙蓉色六月石挂冰霜痕山頭髣髴清虛府
洞底陰岑太行路青苔能識六龍車明月長懸萬年樹
峯盤澗複氣絢緼瑶草金芝日日新君王自有長生藥
端拱無為萬國春

上賜潘司農龍眠拂菻婦女圖

拂菻迢迢四萬里拂菻美人瑩秋水五代王商畫作圖
龍眠後出尤精緻手持玉鍾玉為顏前身應住補陀山
長眉翠髮四維列白氎覆頂黃金環女伴駢肩擁孤樹

背把閒花調兒女一兒在膝嬌欲飛石榴可憐故不與
涼州舞徹來西風琵琶檀板移商宮娛尊奉長各有意
風俗雖異君臣同百年承平四海一此圖還從祕府出
司農潘卿拜賜歸點染猶須玉堂筆天門蕩蕩萬國臣
駟騎橫行西海濱聞道海中西女種女生長嫁拂菻人

李伯時馬

龍眠畫馬真是馬一疋猶當萬金價參差粉墨見龍媒
渴飲長江柳陰下我今老病無所求但願早賜歸林丘

肩輿飽飯百不憂閑看稚子騎犁牛

石國英

鴈蕩能仁寺遺詩

我行天下山水半側身西望長嗟歎山到蜀川方絕奇
世味久被微官絆萬里提兵鴈蕩來高牙一展嵐霧開
松風吹騎連鑣入高日下照繡經臺老僧振錫去何所
香篝寂寂佛無語山鳴谷應應者誰似有秦民宅幽阻
姑休爾旅枕爾鋌雲深不得驚龍眠水晶一派瀉瑤玉

歲與清氣中洄沿二三溪碓長林下人力罷春天所借
草香花淨太古春虎嘯猿吟明月夜幽尋靜勝登嵯峨
鸞旗柱筆光影摩詩成寫破峭壁翠稽首巖前諾巨那

張經

岳陽樓

并序

巴陵形勢甲天下郡治西南有樓曰岳陽盡得巴
陵之勝至元丙戌余以監察御史按臨長沙道出
巴陵凡一往返不暇一登甲午夏備員湖北憲司

分司於辰始得以酬平昔之志噫湖山如此造物者何其靳耶因留數語以識歲月云

洞庭一水七百里煙朝月夕皆經過豈知斜陽萬里更有一佳處君山十二盤青螺乾坤有此樓萬古高嵯峨憶昨長江咫尺限南北風霜晝夜一日千摩挲今朝快一登恍若脫沉疴生平所羨鑑湖請乃今更覺君恩多湘靈也似知我至時令白鳥來婆娑鐵笛紫荊曲春草黃陵歌江山一醉謾不省悲風落日生白波愛山愛水

亦非癖奈此日月如飛梭
彭蠡銀山堆碧海青銅磨
武昌雲間歎黃鶴采石天外愁
青蛾詩家割據幾今古元
氣發泄天不訶扁舟歸來月一
蓑仙槎已候三山阿吾
欲乘興觀銀河

方回

聽孫鍊師琴

名畫元不出畫工善書決不屬書史
子春伯牙非伶官
古能琴者必君子枕流漱石今孫郎
雷眸水齒霜髯張

灑掃書室焚古香信手為我調宮商琮琤琤琤泉落澗
啞啞啞啞鴻度漢從容整暇未肯忙小似吟猱觀抑按
急如快劍斫蛇分兩截琉璃瓶碎玉簪折似有鸞膠再
補完細視冰絃元不絕又如電走電飛驅霹靂老樹百
丈龍爪入得非獺髓滅瘢痕依舊烏桐淨如拭睥睨點
鼠伏狸奴殺機一動與之俱鷹揚頗類師尚父牧野秉
鉞行天誅臨河而聞殺鳴犢曳輪不往反乎覆許由不
受堯天下一瓢雖無吾亦足聖門此意傳不傳耿耿精

靈月在天孫郎何處得授受長江秋霽印嬋娟五音本
無根舌齒六律發揮憑手指音律之外求七情萬變悉
從心上起孫郎曾次夫何如貯儲古今萬卷餘孰謂七
絃軫上之神聖不本二尺檠邊之功夫少年學琴欲學
渠勿但彈琴當讀書

戴表元

自信上歸遊石門訪故人毛儀卿振卿兄弟作
長句贈之

山開未開白雲梯人行不行青麥溪五年清夢隔蟻穴
千里飛塵深馬蹄重來交遊亦笑樂但覺几杖煩提攜
門間霜葉無數積風定水禽時一啼藥草春暄夜更長
木蘭花下聽天雞

題李伯時畫五馬圖

嗚呼良馬不世出令人但尋李侯筆五龍忽隨白雲鄉
海角孤臣看自失太平天子開明堂前驅麒麟後鸞凰
當時此馬來萬里想見顧盼生風霜龍眠老仙亦如此

揮毫談笑羣公裏
官閑祿飽少塵埃
霧閣雲窗天上起
風流轉眼餘山河
人間荊棘何其多
臨風卷圖三太息
此馬今存知奈何

江行雜書

荒城日暮秋江長
櫂楫野熟秋風香
青天茫茫不知處
扁舟臥入菰蒲鄉
波深浪靜魚鴨樂
遙林隋影同飛揚
平生見畫無此本
便欲默寫懸高堂
須臾雷雨漲深墨
漁戶悉閉收牛羊
篙人軟語似憐我
拘蓬蓋頭編篙牀

此時殘暑尚什七瀟灑幸為清蚊蟲無人靜覺物性出
蚯蚓草蟲歌晚涼銅山乳竇青最遠羞縮不似來時妝
但餘田鳥如匹練雙雙飛點暗煙黃山川一日幾變態
人事百年安可常停舟起問魚酒戶此地幾年成戰場
虹梁羽化新起廢白骨無數埋前岡惆悵令人百憂起
飲客正酣歌發狂坐中悲樂誰竟是歸來玉兔搖滄浪

贈趙子實

北風吹沙溪倒飛白日未落山中歸千邀萬覓不相就

誰信有人穿翠微
幅巾大帶長襦袍
韋篋錦囊鮮綵毫
名門發身合燕頤
一經傳家真鳳毛
坐車侯嬴吾不讓
白社寒林氣清放
駮麟翳鶴誰不能
要識神光牛背上
蓬萊山丹霞谷天
仙留書三萬軸
聞君暫去還復來
許君細和滄浪曲

仇遠

題石民瞻畫鶴溪圖

鶴溪近與練湖連
一鏡秋水清無邊
依稀淮岸瀟湘浦

慣見月虹書畫船山翁幾年吳下客
溪草溪花未相識
筆牀茶竈老元真肯與鷗沙分半席

贈張玉田

秦川公子謫仙人布袍落魄餘一身
錦囊香歇玉簫斷
庾郎白髮徒傷春金臺掉頭不肯住
欲把釣竿東海去
故鄉入夢忽歸來井邑依依鐵爐步
碧池槐葉元都桃
眼空舊雨秋蕭颼太湖風月數萬頃
扁舟乘興尋三高
西北高樓一杯酒與子長歌折楊柳
江山信美盍便留

蓴菜鱸魚隨處有

白珽

題松雪臨郭河陽溪山漁樂圖

遠山近山何歷歷下有長溪橫一碧溪中亦有釣鰲手
此手不遮長安日野橋煙樹接草廬飛流如練懸空虛
截山白雲凝不去要人寫作巖居圖

吾丘衍

陳公輔聽雨軒

帝子吟瀟湘瀟湘雲煙竟茫茫楚客歌洞庭洞庭木葉
空秋聲豈如敬亭山前野人宅西風不驚響雲滴燭花
未翦書在牀愛爾元音起虛寂忽無復忽有天灑來自
然山中枕流人如聽洗耳泉神融意適有真趣汝南郭
泰來何暮忽憶隴頭水罷我膝上琴旅人動遐思無此
瀟灑心君不聞簷花悲歌杜陵老山雪空回剡溪櫂祁
寒暑雨無怨咨流麥漂衢竟誰道與君歌聽雨秋雨最
可聽明朝雨歇雲亦散月色滿地秋冥冥

胡長孺

贈相士黃電目

憶昔待詔金馬門，方伎雜還車。
蓋繇黃生蔡子最絕出，高堂不奈笙歌喧。
廬陵老翁才五尺，盱母江頭眼空碧。
相人豈不二子如，秋風夜雨歸無宅。
長身博士老一簞，臯比那博儒生酸。
人生榮華無足夢，桃笙竹枕長闌干。
黃翁勿歎無家苦，華屋連雲更何補。
蜀莊一日不百錢，炳炳幽光二十年。

題段郁文雪石

白雲飛來著春空
翕霍變化生奇峰
朝曦照耀舒復卷
碧華忽擁玻璃宮
秋潮初壯明於雪
千雷動地吳山裂
濤頭出海夕陽微
百煉青銅浮玉塊
雲容濤勢偉且奇
乍出乍沒須臾時
乾篤雪山白盈尺
晴天萬里窺峨眉
似識詩翁作詩苦
獨擁清妍照環堵
河翻月落夜未央
如虹光氣飛屋梁

題秋江喚渡

道傍木葉如渥丹歸急不知行路難青嶂碧溪自喚渡
蹇驢破帽秋風寒裹頭長須甚德色肩輕不借有餘力
人間塵土深復深謹勿重賦招隱吟

題開元三馬圖

牧馬極盛開元中上閑十二皆游龍時平千里不自效
嘶聲脫吻生悲風流傳八駿苦詭怪樂歌天馬徒能工
豈如杜句曹韓畫流雲飛電玉花驄吟詩展卷何獨此
未可與此爭先雄重瞳玉色五百載堦榻相向將無同

誰人臨摹得高意印章彷彿龍眠公但存大略見神駿
未傳五彩分風髣俯仰布置號進景圖成欲上明光宮
安定王孫固英物錦標象軸留其蹤願言藏襲不浪出
駿骨隱隱驚盲聾祇今駑駘厭芻豆鹽車未贖汗溝紅

大水

西昆水源出天河一瀉萬里生驚波濁渾到海更奔猛
潰決猶自吞陵阿瓠子魚龍橫中野至今空唱宣房歌
故迹九道復不得南注安流少休息癡冥陰雲欺白日

不放扶桑光采出連宵達旦雨如傾綠野黃流混為一
河伯侈大未可厭規取桑田廣宮室長鯨老蛟助聲勢
城郭波浪相沈沒神禹衣冠藏會稽大叫不聞將安為

龔璠

春日寄懷書堂

閭門柳如帶中有別離在當時官河船飄搖忍相待二
月東風吹暮寒追送百里問河干破屋殘燈人去住欲
語不語千萬端竹雞鉤輶啼夢闌九山道中雨漫漫已

恨金華六年別當時再鼓荆江楫七年又恨瀟湘閣人
生貧窶北門憂我一思之生白髮白髮生何足驚志士
潦倒俱無成酒澆磊砢澆不平況復不飲難為情長歌
短歌無新聲念我獨兮在吳城今年石湖好清明每樹
梨花香雪晴夫君不來湖上亭昨朝見家信紙尾煩相
問是親不可疎既遠不可近此身江海事多違往往舊
交零落盡我亦徘徊看舞謳誰家歡宴及春游越王郊
臺踏芳草危絃二七彈箜篌箜篌嘈雜兒女語繡柱朱

絃生眼霧感物逢時重懷古悠悠我行處總是哀遲路
待君歸來問君故各天一涯水東注

題鄭子實著色溪山漁樂圖

東風忽來吹綠雨閑雲更學苔花舞山中之人歸未歸
溪上漁舟泛春渚

吳中寒食

寒食清明賣酒家酒瓶亂插紅白花江南蠶子非一種
日暖蜂房報午衙八十漁翁罾半破往來醉客路三叉

村中女伴無忙事
疎雨小塘收漾紗

馬虛中柳城春色圖

城中塵頭十丈高
欲畫春風風怒號
佩霞仙人騎鶴背
却度太虛觀樂郊
當時丹青爭出色
借與天公動搖碧
上流老子餘舊踪
桓大將軍亦曾植樹
猶如此我何堪
莫學江南繫船客
雉堞平成天下平
有情有思弄春晴
隔葉睂睵黃鸝聲

袁易

八月一日雨後賦兼寄城中諸友

今我不樂思出遊宿酒昏昏仍懶惰
安得涼飈破煩鬱
竹頭搶地桐陰妥
紈扇那能脫腕揮
紗巾不覺酣眠隨
誰喚飛雲起天末
政用此時持贈我
渴龍掉尾下飲江
列缺為右豐隆左
蜿蜒初若彌六合
變滅忽復成么麼
長空收曠淨千頃
落日著山縣
米芾白衣蒼狗覓虛無
孤鶩斷霞明細瑣
人生萬事風雨散
苦欲控搏無一可
嗟予學道良已晚
閱世忘憂今亦頗
西疇罷亞碧參差

南埭芙蓉紅婀娜聊尋清景日追逐
況復川原秋淡沲故人城郭尚留連
何時共鼓吳淞柁

郭麟孫

題趙子固蘭蕙卷

寫蘭以左筆為難此圖筆筆皆向左
香風一夕從西來數片湘雲忽吹隨
天真滿堂呈爛熳晴煙低葉分婀娜
紫莖縹緲散層華翠帶交加藏側朶
初觀駭目若零亂諦視凝神還帖妥
想翁落筆風雨疾不待解衣盤礴羸

但覺書紙如書空唯知有蘭那有我胷中所在皆衆芳
變化縱橫無不可他人一二已云多翁今能事一何夥
嗟予作畫雖不能知蘭之趣亦頗頗再觀品題驚絕倒
照眼驪珠十六顆清氣襲人肌骨寒手之不置行與坐
陶君珍重祕藏之玉軸牙籤善封裹

題高尚書秋山暮靄圖

長江萬里流滔滔風平如席靜不濤老楓疎柳澹雲影
欹岸側崑明秋毫紅塵一點飛不到何人結屋江之臯

霜清水落沙嶼出蘆葉瑟瑟鴻南翔一峰翠律聳峨髻
俯視培塿如兒曹晴嵐朝爽滴空翠樹林露沐滋流膏
心融造物意慘淡筆挾風雨聲蕭騷淋漓元氣猶帶濕
收拾萬象無能逃扶輿清淑聚胃次固應獨擅人間豪
未容小米詫能事千古且說文昌高世間神物不易得
牙籤玉軸歸時髦我來坐窗疲不遑展卷頓覺舒鬱陶
何煩蠟屐躋攀勞崦西小紅尋野桃

題蘇子瞻翰墨

山頭翠律侵霄漢片幅之間據其半河水盤旋寒玉貫
雲氣濛濛中截斷峰巒回合平若接山城嵯峨聳樓觀
下有森森林木灌隱約浮空露纖巖沙平野曠征途遠
行人凌競馬欲汗天機滿前呈爛漫濃墨如新筆凌亂
渾沌鑿破太極判元氣淋漓風雨散若非定以范寬斷
誰能展此奇手段玉堂老仙重稱賞絕筆當為古之冠
牙籤玉軸宜倒看縱得千金慎勿換老眼摩挲獲珍玩
不敢為題只驚歎

湯彌昌

題趙子固蘭蕙卷

泛蘭轉蕙光風春靈均妙與花寫神胷中九畹無纖塵
摹寫形容方逼真彞齋作畫詩興寓寄齋作詩知畫趣
意匠經營託豪素心手縱橫生態度紫莖綠葉墨淡濃
湘魂澧魄香融融後來三絕松雪翁心讓此花能品中

黃庚

題東山翫月圖

斜陽紅盡暮雲碧一片天光涵水色海濤擁出爛銀盤
千里嬋娟共今夕主人領客登東山踏碎寒光看秋液
星河倒影浸空明露華溥玉夜氣清馮夷激水水欲立
海若辟易天吳驚孤舟卷帆泊煙嶼古木撼壑生秋聲
憑高人在金鰲背閑看潮生煙渚外老龍翻海雲氣寒
長鯨卷雪浪花碎茫茫萬頃滄浪中屹立孤峰鎖蒼翠
山巔埽石羅尊壘賓主傳杯不放杯騷客掀髯賦詩去
山童踏月攜琴來劇談浩飲不知醉仰天長笑歡顏開

倒著接羅欲起舞乾坤清氣入肺腑天邊風月空四時
眼底江山自千古謝安躡屐遊東山袁宏登舟宴牛渚
庾亮南樓今在不坡仙赤壁知何許滿眼往事轉頭空
千年人物俱塵土人生光景若湍流霜痕易點雙鬢秋
胷中勿著塵俗事眉間休鎖名利愁我輩適意在行樂
古人所以秉燭遊月山追憶舊遊處盡寫風烟入縑素
我來見畫如見景想像高唐猶可賦諸君後會應可期
雲萍合散今何之安得扁舟澈川去日與杖履相追隨

登山把酒醉明月共看此畫歌此詩

尹廷高

銀嶺書懷

并序

大德乙巳端陽將男祖憲祖惠遠遊出門風雨大
作四日始度銀嶺泥滑不可言偶誦銀嶺遙遙馬
戍高之句蓋古野人語也足而成章

泥滑滑泥滑滑竹雞雨聲相間發銀嶺遙遙馬戍高行
行白盡征夫髮征夫髮白白如絲樹本欲寧風撓之壯

士心腸類鐵石別離肯作兒女悲終南嵩華在何許我
欲登高一懷古會逐群仙駕紫鸞咳唾九天落香露

雨中度揚子江見海怪出沒

吳頭楚尾天一隅長江浩渺雲模糊中流風急浪花湧
船頭黃帽驚相呼蜿蜒海怪互出沒踴躍與我為先驅
神閑意定若無見自信膽氣由來麤江神唯識詩客意
故爾獻狀聊相娛岸傍青帘酒可沽拔劍割炙傾玉壺
與君痛飲留斯須此景此意不可孤山川慘淡百戰餘

古今變態難盡摹且書雨裏金焦圖

盧溝曉月

闌干滉漾晨霜薄馬度石橋人未覺
滔滔流水去無聲月輪正挂天西角
千村萬落荒雞鳴大車小車相間行
停鞭立盡楊柳影孤鴻滅沒青山橫

薊門飛雨

清風夾道槐陰舞誰信青天來白雨
馬上郎君走似飛樹下行人猶蟻聚
須臾雲散青天開依然九陌飛黃埃

乃知造化等兒戲一日變態能千迴

李簡

重登泰山

憶昔游泰山於今二十載傷心此日重登臨
山色依依人容改三峰突兀與天齊
天門未到勞攀躋層層石磴出林杪
縈迴百折青雲梯盤石甃憩舒清眺
澗壑風來號萬竅水聲俄在樹梢頭
疑有於菟天外嘯向曉才登日觀峰
手披雲霧開鴻濛火輪欲上海波赤
金霞翻動

蒼龍宮黃河一線幾千里吳越山川真地底為數齊州
九點青更將伏檻窺南溟李白不遇安期生安得羽翼
飛蓬瀛

郭鄧

蟹

請君聽說吳江蟹除却吳江無處買豈無鬱州與上海
獨許汾湖十分倍筐如負笈行披鎧大者盈斗吁可怪
爬沙驚倒兒女駭黃金填胃高塊磊十月尖臍更精彩

玻璃瑪瑙光璀璨髓香骨脆味瀟灑坐令華堂厭烹宰
好辨糟丘與醢醢醢藉風流無不改介夫佳傳傳千載
牟應龍

題高尚書夜山圖

觚稜昔枕萬松嶺金碧青紅縹緲間萬家環之密如櫛
只見樓臺不見山九街車馬何填咽隱隱轟轟夜不絕
市聲未散朝馬嘶只見燈火不見月祇今山上居民稀
岡巒盡露青逶迤昏鼓鼕鼕人跡絕山空月明景更奇

謫仙把酒看不足摩詰收之入橫幅要令赤日黃埃中
翠色冷光常在目就中何處最愁予剝竿高矗白塔孤
綵筆昔曾干氣象短髮搔斷空踟躕世間萬事何不有
雍門悲涼百年後惟有明月與青山古往今來鎮如舊

楊學李

西郊晚步

江城五月風雨餘嶺南地僻少馳驅政餘長日無與俱
尋幽步屨城西隅地平山遠迷綠蕪垂楊深處聞鷓鴣

縈紆小徑通浮屠松風夾道如笙竽清池冷浸秋水菰
如有露氣侵庭梧桃笙院靜橫竹奴栩栩清夢遊冰壺
覺來殘照不可呼更待好月同歸塗

望雲樓

并序

樓在賀州治之東北紹興間太守黃尚賢所建高
壓城壘下瞰江山是為一郡之奇觀年深頽圯大
德癸卯余命工葺而新之獨以未經前賢題咏為
斯樓欠事暇日輒一登臨為之神怡心曠因成十

二韻以紀其勝

樓前山色青如鬟樓高夜映星斗寒推窗縱目納吟思
倚檻爽氣生眉端荒煙宿靄迷野甸古岸怪石橫驚湍
城孤下瞰天蘸碧日永坐聽風鳴鑿登臨獨慨城郭是
把酒一酌還三歎雖未如元龍高卧之百尺已不減庾
公步月之遊觀又何須黃鶴霄漢之浩渺亦可想岳陽
煙水之瀰漫蕭然獨立賀江許已矣樓中沸歌舞勝境
無詩亦可羞謾自簷楹庇風雨望雲人遠迹生塵祇有

江流自今古


御選元詩卷二十四

謹案卷二十三第二十五頁後五行沿溪羅翠屏
刊本沿訛治據別本元詩改

卷二十四第三十三頁後六行盡寫風烟入鱗素
刊本烟訛流據月屋漫稿改

第三十四頁後四行長江浩渺雲模糊刊本模糊
訛糊模據玉井樵唱改





總校官庶吉士臣侍朝

校對官檢討臣蕭九成

謄錄監生臣周元